

DOMENIE XIV «VIE PAL AN»

Jutoris pe Liturgjie

Domenie, ai 07 di Lui dal 2019

O podaressin subit meti il vanzeli di vuê te curnîs de Europe e dal nestri Friûl li che la scristianizazion e galope so redut tes gnovis gjenerazions. La realtât e je cheste: la int e stente a cjatâ te glesie la atualizazion semplice e concrete de peraule di Crist o adiriture no le cjate.

Te messe di vuê o vin propit il vanzeli de evangjelizazion: il Signôr al sielzè altris setantedoi dissepui, ju mandà doi par doi denant di sé e ur diseve...

I esegjetis a son dacuardi tal concludi che l'evangjelist Luche al à mudade la realtât dai fats intun mes teologjic, cuasi tun piçul vademecum de evangjelizazion.

O vin culî, no une frede dutrine di compuartaments ma une pagjine di alte spirtualitât li che il dissepul al è clamât a uniformâsi lui par prin a la mentalitât dal Mestri di Nazaret.

La evangjelizazion e je un mût di vivi prime che un "predicjâ", o piês ancjemò un "indutrinâ".

La evangjelizazion no je in ce che o vin di fâ, ma in ce che o vin di sedi; no je tal convertî chei altris, ma tal convertîmi me al Spirt di Crist. Dut al ven dopo di chest, ancje l'organizazion glesiastiche e i plans di colaborazion pastorâl.

Dome tal sfuarçâsi di meti in pratiche lis esigjencis dal vanzeli di vuê, al ven il comant di Crist: Lait! Ve, jo us mandî...

Ma scoltin ce che nus dîs la antifone di jentrade:

Antifone di jentrade

Sal 47,10-11

O stin pensant, Diu, al to boncûr
dentri dal to templi.
Come il to non, ancje la tô laut, Diu,
e rive sun dute la tiere;
incolme di justizie e je la tô diestre.

Colete

Diu, che inte umiltât di to Fi
tu âs tornât a tirâ sù il mont che al jere colât,
da ai tiei fedêi une sante contentece
par che a puedin gjoldi pe eternitât
chei che tu âs sfrancjâts de sclavitût dal pecjât.
Pal nestri Signôr Jesù Crist to Fi, che al è Diu
e cun te al vîf e al regne dutune cul Spirtu Sant,
par ducj i secui dai secui.

PRIME LETURE

Is 66,10-14

Ve, o farai lâ viers di jê la pâs come che e fos un flum.

O sin tal secul V p.d.C. e i esiliâts tornâts a Jerusalem si cjatin in condizions di fâ pietât. A lôr il Signôr ur mande un profete che ur torne a dâ spirt: o sarês consolâts. / O viodarês e il vuestri cûr al gjoldarà, / i vuestris vues a cjapanan vigorie come la jerbe. / La man dal Signôr si pandarà ai siei fameis.

Cheste profezie e presente ben lis sperancis - contentece dal cûr dai tîmps di Gjesù, cuant che lui al sielzè... ju mandà e ur raccomandave: Vuarî i malâts che o cjatais e disêtur: Il ream di Diu al è dongje.

Dal libri dal profete Isaie

«Indalegraitsi cun Jerusalem,
e gjoldêt par jê, ducj vualtris che i volês ben!
Gjoldêt plui che o podês cun jê,
ducj vualtris che o vês patît par jê!
Par che o podês tetâ e saceâsi
al pet des sôs consolazions,
par che o cjucjais e si consolais
al pet de sô glorie.
Parcè che il Signôr al dîs cussi:
«Ve, o fasarai lâ viers di jê
la pâs come che e fos un flum,
e come un riul che al stranfe
la glorie dai forescj.
O cjucjarês e o sarês puartâts tal braç,
e o sarês niçâts sui zenoi.
Come un fi che la mari lu console,
cussi ancje jo us consolarai vualtris;
a Jerusalem o sarês consolâts.
O viodarês e il vuestri cûr al gjoldarà,
i vuestris vues a cjaparan vigorie come la jerbe.
La man dal Signôr si pandarà ai siei fameis».
Peraule di Diu.

SALM RESPONSORIÂL

dal Salm 65

A son culî memoriis di grancj avveniments dal passât: al à tramudât il mâr in tiere ferme, / il flum lu àn passât a pît. Chest verset si riferis a la traversade dal Mâr Ros cun Mosè e al passaç dal Giordan cun Gjosuè (Esodo 14; Gjosuè 3). Il salm al continue cun testimoniancîs personâls: ce che lui al à fat pe mê vite.

Noaltris Furlans o sin ignorantons sui fats de storie locâl e no rivin a capî ce che te storie il Signôr al à fat par nô; in plui, come popul, nus mancje il gust di une liberazion sociâl - culturâl e la sperance di un avignî te nestre identitât e dignitât.

Al di là di chestis riflessions di fonde, peinsi vuê a la prime leture e, o scrupuli, a la nestre vite par glorificâ Idiu disint:

R. A son propit grandis lis voris dal Signôr.

Se cjantât: Il cjant dai salms responsoriâi, p. 239.

Cjantait a Diu di dute la tiere,
dal so non cjantait la glorie;
dait sflandôr a la sô laude.
Disêt a Diu: «Cetant bielîs che a son lis tôs voris.
Denant di te si plee dute la tiere
e ti cjante a ti, al to non e cjante». **R.**

Sù mo, cjalait i spetacui di Diu:
il so mût di fâ cui fis dai umign che al è une robone.
Al à tramudât il mâr in tiere ferme,
il flum lu àn passât a pît.
Sù mo, in lui fasìn fieste!
Cu la sô potence al comande in eterni. **R.**

Sù mo, scoltait, vualtris che o rispétais Diu,
parcè che o vœi contâus ce che lui al à fat pe mê vite.
Benedet seial Diu, che nol à rifudade la mê preiere
e no mi à dineât il so boncûr. **R.**

SECONDE LETURE

Ga 6,14-18

O puarti tal gno cuarp i sigjî di Crist.

San. Pauli al conclût la letare ai Galazians cuntune confession personal: lui al à patît e al è pront a patî par puartâ l'amôr insegnât di Gjesù tal mont. In cheste maniere, lui al partecipe a la passion di Crist e al devente une creature gnove.

Dut al è grant in S. Pauli, ma ancje dut al è sempliç e si concretize tal patî par amôr. Cussi al varès di sedi des nestris comunitâts.

Par jessi cristians o vin dome di volê ben e, tal volê ben, sacrificâsi par amôr dal Signôr e dal prossim. E je cheste la vere evangjelizazion di îr, di vuê e di simpri. E a chei che a laran indenant cun cheste regule, pâs e misericordie par lôr.

De letare di san Pauli apuestul ai Galazians

Fradis, par chel che mi rivuarde me, che no mi capiti mai di vantâmi di alc che no sedi la crôs dal Signôr, che midiant di lui il mont al è stât metût in crôs par me e jo pal mont. Di fat ni la circoncision ni la manciance di circoncision no contin nuie, ma dome il jessi une creature gnove. E chei che a laran indenant cun cheste regule, pâs e misericordie par lôr e pal Israel di Diu.

Di chi indenant nissun nol à di lambicâmi: di fat o puarti tal gno cuarp i sigjî di Crist.

La grazie dal Signôr nestri Jesù Crist che e sedi cul vuestri spirt, fradis. Amen.

Peraule di Diu.

CJANT AL VANZELI

cf. 2 Cor 5,19

R. Aleluia, aleluia.

Al è stât Diu a riconciliâ il mont in Crist,
dantnus a nô la peraule de riconciliazion.

R. Aleluia.

VANZELI

Lc 10,1-12.17-20

Al cjarparà la pâs che i augurais.

Ju mandà doi par doi: *piçule comunitât, tune esperience di condivizion e di responsabilitât un pal altri;*

preait il paron dal cjamp: o sin dependents, servidôrs, fameis; o vin di sielzi di stâ in bas fra chei che a servissin e no in alt a detâ leç di parons;

agnei framieç dai lôfs: e ven escludude ogni presunzion tes propriis fuarcis; ogni fâsi valê cu la prepotence; ogni violence;

no stait a puartâ ni sporte: ma dome l'essenziâl par vivi; par evangjelizâ nol covente cui sa ce: a bastin preiere, semplicitât e grant amôr pal prossim;

no stait a saludâ nissun: no stait a pierdi timp in cjacaris;

pâs a cheste cjase: la pâs no ven a bachete; il capîsi, risprietâsi, lâ dacuardi, perdonâsi, condividi a son te fonde dal vanzeli e vivûts nus puartaran la vere pâs;

vuârît i malâts: prime dai grancj plans pastorâi; prime dal balin de organizazion;

e disêtur: Il ream di Diu al è dongje: dongje a cui? ai puars, ai scartâts, ai profugos, ai tibiâts, ai sclâfs di vuê; ma chest, se o savarin individuâ cui che al è il sclâf, ce raze di sclavitût che al à intorsi e si studiarin di dâi une man par crevâ lis sôs cjadenis;

nô o scjassin cuintri di vualtris ancje il pulvin: une grande libertât di moviment: mangjâ ce che al è; no peâsi a di nissun, savê pierdi cun dignitât.

Cheste e je la famee, la glesie di Gjesù: semplice e lizere, li che ognun di cualsiasi categorie, colôr, ideologie e pecjât al sa di jessi ricevût e in ce che si pues, judât.

Glesie poiade te umiltât, corajo, fiducie tal Signôr, li che al dîs Gjesù: O viodevi satane a plombâ jù dal cîl come un folc.

Il vanzeli di vuê nus mene a grandis riflessions parcè che nus vise cemût començâ a riformâ lis nestrîs comunitâts cristianis di paîs.

Dal vanzeli seont Luche

In chês volte, il Signôr al sielzê altris setantedoi dissepui e ju mandà doi par doi denant di sè, in ogni citât e lûc che al stave par visitâ. Ur diseve: «Il racuelt al è bondant, ma lavorents ind è pôcs. Preait alore il paron dal cjamp par che al mandi lavorents pal so racuelt. Lait! Ve, jo us mandi come agnei framieç dai lôfs. No stait a puartâ ni sporte, ni sac, ni sandui. Par strade no stait a saludâ nissun.

Cuant che o jentrarês tune cjase, disê prin di dut: Pâs a cheste cjase. Se li ind è cualchidun che i ten a la pâs, al cjaparà la pâs che i augurais; se no il vuestri auguri nol valarà nuie. Restait in chês cjase, mangjait e bevêt ce che us daran, parcè che il lavorent al à dirit di jessi paiât. No stait a passâ di une cjase in chês altre.

Cuant che o larês intune citât, se cualchidun us acete, mangjait ce che us ufris.

Vuarî i malâts che o cjatais e disêtur: Il ream di Diu al è dongje. Se invezit o jentrarês intune citât e nissun no us acetarà, lait fûr in place e disê: Nô o scjassìn cuintri di vualtris ancje il pulvin de vuestre citât che si è tacât tor dai nestrîs pîts. Tignî a ments però che il ream di Diu al è dongje. Us garantis che te di dal judizi la int di Sodome e sarà tratade cun mancûl rigôr che no la int di chês citât.

I setantedoi dissepui a tornarin indaûr plens di gjonde disint: «Signôr, parfin i demonis nus ubidissin, cuant che o clamin il to non». Lui ur disê: «O viodevi satane a plombâ jù dal cîl come un folc. Jo us ài dât il podê di tibiâ sarpints e sarpions e di fruçâ ogni potence dal nemî. Nuie nol podarà fâus mâl. No stait però a gjoldi parcè che i demonis us stan sot, ma invezit parcè che i vuestris nons a son scrits tai cîi».

Peraule dal Signôr.

Su lis ufiertis

Cheste ufierte consacrade al to non
che nus smondei, Signôr,
e nus puarti di zornade in zornade
viers de vite dal cîl.

Par Crist nestri Signôr.

Antifone a la comunion

Sal 33,9

Cerçait e o viodarês cetant bon che al è il Signôr:
furtunât l'om che li di lui si pare.

Daspò de comunion

Colmâts di tancj regâi, ti prein, Signôr,
di cjapâ ancje il regâl de salvece
e di no cessâ mai inte tô laude.

Par Crist nestri Signôr.

* * *

Cjants

Libri Hosanna, sot il titul Eucaristie: messe, benedizion eucaristiche, rîts e cjants; dal n.7 al n.62 comprendût.

* * *

Il mês di Lui al è un mês speciâl pe nestre glesie di Aquilee

- + Joibe 4: **S. Eliodôr** vescul; al è vivût fra il IV e il V secul; al à partecipât al Concili di Aquilee dal 381;
- + miercus 10: **S. Piu I, Pape**, nassût a Aquilee, secul II, fradi di Erma autôr de opare “Il pastôr”;
- + vinaris 12: solenitât dai **Ss. Ermacore vescul e Fortunât diacun** protomartars de glesie mari di Aquilee e protetôrs des arcidiocesis di Gurize e di Udin;
- + sabato 13: dedicazion de **basiliche di S. Marie** di Aquilee.

Domenie 14 sore sere Messe grande di Glesie Furlane a Aquilee

* * *

Di fronte ai vuoti sempre più numerosi che si creano nelle piccole parrocchie quando viene a mancare la presenza del prete, c'è il rischio di risolvere il problema mandando il prete vicino, che garantisce il servizio di culto e fa un po' di catechismo ai fanciulli e ai ragazzi della cresima. Mentre il Paese e il nostro Friuli necessita di una nuova “implantatio evangelii” e di una catechesi a partire dagli adulti, c'è la tendenza a privilegiare la sacramentalizzazione e ad assicurare servizi di culto.

Non è questo il modo con cui lo Spirito di Dio ci invita a prepararci ad affrontare il futuro...

... Lo Spirito del Signore ci chiede il coraggio di rivedere il nostro modo di valorizzare la presenza e l'azione dei laici nella Chiesa per il mondo.

In una chiesa che sacramentalizza, ha la prevalenza il prete. In una chiesa che evangelizza i laici hanno il loro posto...

... Il Signore conosce il nostro futuro: verrà il momento di ordinare presbiteri di piccole comunità dei coniugi? Il problema è molto complesso. Non è in nostro potere deciderlo. Intanto però c'è la possibilità di promuovere catechisti, accoliti, animatori di comunità, diaconi permanenti.

Mons Alfredo Battisti, Profezia di Vescovo, anno 1987.

* * *

* *I cjants, salms e cjantadis a vegnin ripuartâts cu la numerazion dal libri: Hosanna, Cjants e preieris dal popul furlan, Ed. Glesie Furlane, 2012.*

* *Il cjant dai salms resposoriâi, Ed. Glesie Furlane, 2012.*

* *50 corâi de cristianitât todescje voltâts par furlan, ed. Glesie Furlane, 2016.*

* *Par domandâ chescj libris scrivêt a info@glesiefurlane.org*